

廣東歷代詩僧簡介（十六）

慧光居士

古 蔭

古蔭字覆人，香山梁氏子，家素封，田園室廬，甲於里閭。蔭志存澹泊，盡推讓與諸子姪，圓頂方袍走方外，徧參機緣多不契，還粵徑投雷峯座下，禮天老人受具。初領點座，尋遷副寺，勤勞一十八載，銖積寸計，拓置稻畦菜圃，樹藝相望，雷峯山門瓠齏數十丈，咄嗟而辦，人莫測其才量，已亦不自炫焉，以積勞咯血終，世壽五十六，人咸惜之。

春日送塵公大師住華首臺

名山久待闢煙霞，況是吾宗第一家，塵拂錦屏開罨畫。龍歸黃洞散天花。不經劫火長松直。獨抱高風毒鼓過。仙日擬尋堂構地。杖頭憑指路欹斜。

秋 鐘

露濃雲重漏初長。一點寒鐘出上方。松鶴醒回潭底夢。野猿驚破嶺頭霜。悠颺暗渡隨秋水。灑落頻驚在夜涼。最是菴燈孤影下。聲聲喚起鐵肝腸。

送東水師住芥菴

小院雖涼亦祖庭，翠苔行掃石苔青。園垂野果山神供。窗動高吟水鶴聽。村近修篁穿露筍。菴猶一芥聚浮萍。全憑粥飯招龍象。始信名山到處靈。

陳顛菴先生讀覆人詩絕句：菴燈孤影漏初長。一點寒鐘出上方。喚起未容枯寂處。濡毫聊寫鐵肝腸。

古 詮

古詮字言全，番禺人，黃姓，少負夙慧，力學好古，操行端方，兄弟皆為鄉閭所重。素聞天老人以宗門事接引後學，束身來皈，求雍染受具，執侍勤謹。老人愛其誠樸，念華首為空老和

尚鍵椎地，非高行衲僧不與茲選，特命詮領院事。至則剔蕪艾穢，斂租輸稅，頗殫心力，以疲勞咯血病蛻於華首，老人有詩悼之。

華首臺

錦屏開傑閣。山到此彌尊。八百仙人宅。三千龍象門。獲溪分復合。四壁寂還喧。大好安禪定。因之溯洞源。

天華宮

中原方逐鹿。地築假王宮。碣臥黃龍背。階藏朱草叢。松釵霑露滑。竹粉墮霜風。共選幽巖歇。頽垣修夕蛩。

朱明洞

巨石當門關。猶存古洞名。湫流聲漸細。靈窟地俱平。老鶴窺人起。奇花別俗生。林間朱果落，遺核又將萌。

沖虛觀

葛仙遺履在。此地已成塵。客尚求丹竈。仙宜笑俗人。橙花閒砌落。竹鹿野田馴。辟穀無勞問。青房原不貧。

見日菴

上界鴻濛異。三更日漸昇。星河猶在樹。川嶽已如蒸。藉草眠當露。燒枯凜若冰。天鷄初發候。攪袂欲晨興。

夜樂洞

天風吹萬竅。坐聽辨鈞天。卜晝辭瑤席。良宵出管絃。吹笙自緱嶺。鼓瑟來湘川。迥異人間世。應為何代仙。

大小石樓

過此峯逾峻。峯形隱石樓。丹梯無路入。碧牖不知秋。怪樹如人立。淩雲似水流。若非鸞鶴背。安得陟丹丘。

卓錫泉

靈泉臨皓月。空水共圓明。一掬能探砥。千瓢任取盈。飲思仁智力。沁得夢魂清。挹取軍持下。能令煩熱輕。

延長寺舊址

皇唐崇象教。金地此中開。撫景尋塵跡。何年飛切灰。青鳥猶選勝。白馬不奔回。自有重興者。應須乘願來。

梅花村

恍惚香風過。携筇意悄然。一陂芳草地。數里夕陽天。疏影消殘雪。多情立晚煙。美人清夢斷。誰擁白雲眠。

陳顥菴先生讀言全詩絕句：空老健樵有洞源。羣仙擁處佛稱尊。尋詩朱草黃龍地。清夢梅花共一村。

古義

古義字自破，新會人，姓盧氏，出世丹霞，歷諸上剎均典重職。雅好游泳，居海幢客寮，方外開士無不知有破公者。性嗜茶，所居列佳茗，第其上下，著有茶論一篇。掛錫名山雖多，然住不久。晚隱新州竹院，瓶笠蕭然，泊如也。後聞角子和尙繼席丹霞，策杖來歸，竟終於丹霞，所著有詩百餘首。

渡鄱陽湖

日色蓬窗靜。風生枕簟涼。十年湖海志。半笠水雲鄉。故國懷人遠。閒吟笑我狂。扁舟廬嶽去。挂席過鄱陽。

酬同學

僻性耽泉石。空山樂歲時。雲霞憑作伴。麋鹿許相期。春暖花開早。堂深日上遲。箇中無限意。端的少人知。

桐山寺訪雲相老師

曲徑幽棲處。登臨興有餘。溪雲雙眼潤。庭竹一林虛。野蘚半侵戶。清泉直到厨。頓令心地冷。意欲傍鄰居。

過玉華精舍訪慧達上座

十年同學在。半笠到西山。獨念相思苦。都忘行路難。風生雲影碎。雨過水聲潺。對此幽棲事。商量好閉關。

望夫石

佇望何時了。相思不計年。芳華空自惜。尺素向誰傳。細雨曾和淚。冰心對所天。肝腸如鐵石。風月自娟娟。

登祝融峯

層巒峭壁好摩天。四面雲峯斷復連。夏帝碑藏蟲篆古。寅賓日出海邊懸。遙看峻嶺應回雁。欲過危橋去會仙。千載猶聞黃獨美。幾人能繼懶殘禪。

清遠舟中

十載荷衣多遠遊。孤城薄暮自維舟。煙飛水面全籠樹。月落潭心不礙流。坐久空聞風撼石。更闌無語被蒙頭。箇中消息如何會。鷗鳥忘機最好儔。

呈惟聖老和尚老人開法鷄足三十餘年今歸隱衡陽

鷄足山中舊草堂。名聞海內震諸方。如今老眼青尤白。曩昔風流卷欲藏。沒腳馬曾跨宇宙。無絃琴豈別宮商。明年不負衡山約。到此忘機欲歇狂。

陳顥菴先生讀自破詩絕句：半生雨笠與風簑。眼底名山似逝波。人識破公吟興好。詩清都爲飲茶多。

古行

古行字克躬，順德人，循圓通公族弟，童子時與足兩嚴公同鄉塾，世亂遂棄簡策慨然有出世之志，以親老依戀子舍。逮服養至歿，即入雷峯脫白受具，行募於吳楚閩越中，積有勤勞。丙辰嶺外阻梗，老人念棲賢困阨，音問濶絕，間關無可使者，行毅然請往，至淨成順化。

還棲賢留別諸同學

微茫春樹隔晴川。獨立津頭覓渡船。荒戍尙懸高柵火。寒原那有傍村煙。亦知長路艱難苦。更念空山寂寞禪。此日分鐘離院後。斷鴻斜日泊江天。

陳顥菴先生讀克躬詩絕句：竹篋焚餘荻帳哀。吟髭雖白不徘徊。空山萬里關情處。詩景蒼茫志未灰。

古昱

古昱字融虛，其先高州信宜人，族姓曾，徙居惠州，弱冠出世於閩之上杭，得戒於江西圓宗永繼傳和尚。初依象林慧弓大師

，慕海幢道風之盛。往參阿大師，由副堂晉維那。大師歿，遷往石龍蘭若，旋復返海幢典客。及樂說澤萌角子三禪師開戒，皆選充教授闍黎。後隱居雷峯，司藏鑰，足跡不出戶限者數年，惟焚香閱藏，興至時一吟詠而已。生平狷潔自好，嚴奉毘尼，喜交游，重言諾，取與不苟，多爲縑素所重。庚辰夏以滯下病，至辛巳春初示寂。臨終有偈辭衆曰：夙業已纏綿。如今一長年。此事未提起。西方即目前。擲筆而逝，世壽五十二，僧臘三十四，有遺詩五卷藏山中。

送洞開師住山

同居曾數載。幽獨許誰知。明日珠江別。何時海寺期。山寒

秋到早。霜冷雁來遲。他夕相懷處。應看月照池。

初秋省覲途次

晚涼添旅夢。夜泊亂蘆州。新月懸清照。銀河掛碧流。煙雲

江上客。沙渚路邊鷗。遙憶故山裏。徘徊天際頭。

同不挂師舟宿

舟宿珠江下。夜涼風有聲。疏星搖穗石。片月照羊城。漁艇

分燈靜。山村入畫平。坐談佳句好。水鳥自逢迎。

閒居卽事

閒居不覺久。溪樹已成陰。雲氣生南岸。經聲出北林。偶行

隨鳥啄。時坐聽蟲吟。一種清涼處。蕭然話又深。

平生如許事。從此一無成。白日下午林麓。青山隔市城。地偏

人意靜。花老蝶魂輕。近得榕橋興。閒吟忘世情。

聽雨

細雨難成夢。寒階滴有聲。山風繞籬暗。溪鳥候潮鳴。花裏

雲應濕。橋邊綠漸平。東臯須有事。明日及春耕。

秋夜聽盧雁林彈琴

一曲來心上。清聲未易逢。月明今夕裏。琴操此山中。颯沓

松堂靜。纏綿夜燭紅。知音不可得。珍重古人風。

仲春初入雷峯

幽居宜靜者。世事不經心。坐對疏簾下。閒談永夜深。焚香

閱新藏。洗鉢起行吟。長此北樓上。鶯啼聽好音。

送塵異大師住羅浮華首臺

法雲昔歲別匡廬。又愛羅浮住祖居。好鳥語連清磬響。寒窗色並野花舒。行過澗水閒窺影。坐擁名山獨著書。最羨長松無一事。新詩贈客足清虛。

北畹與淡菴師夜坐

輕舟破浪獨尋君。咫尺東湖一片雲。石榻夜沈花蕊積。禪堂定後篆香焚。疏籬傍竹搖空月。密樹沿池暗水紋。笑語不知春夕曉。五更鐘磬許誰聞。

訪了塵兄山寮

山齋無事日尋君。共坐禪關細論文。竹閉四圍花向日。窗開一望月離雲。門臨野艇潮先到。路入煙村樹欲昏。最喜故交情更好。宛如溪畔鶴同羣。

聞雁

靜坐茅堂一衲間。忽聞朔雁過空山。長天白影雲爲伴。九月秋風我共閒。海外沃田聊寄食。島邊衰草莫孤還。幾聲嘹唳知何意。不覺籬花已換顏。

喜而卓師得法華林

振錫全機話已忘。眼光蓋頂徹虛堂。箭鋒八面當陽失。寶劍單提萬法彰。濟脈驚聞添法乳。戲場堪羨印空王。憑誰說與羣聾輩。一曲無絃只自將。

海雲寺雨中登樓

樓上霏微意自閑。海雲幽處更躋攀。天邊煙翠千帆落。林下寒溪一鳥還。幽磬半沈蕭颯裏。漁舟恰在渺茫間。與君且盡歡談意。無限陰晴在遠山。

陳顛菴先生讀融虛詩絕句：蒼黃世早不經心。讀罷餘香時一吟。中晚唐音五言律。風裁不限在山深。淒雨霏微意自閑。春風詞客足音慳。推窗何物供詩料。無限陰晴在遠山。